

Surselva 7

Gievgia, ils 4 da matg 2017

Presentau in vast program da lavur

Emprema radunonza generala dalla GiuRu egl agen local a Cuera



(anr/sm) La Giuventetgna Rumantscha (GiuRu) ha presentau la sonda vargada il program pil proxim onn ed eligiù in niev cassier. A caschun dalla radunonza generala dalla GiuRu ha la giuvna cantadura Chiara Jacomet cantau entginas canzuns da siu album «Mascras». Per la GiuRu eisi stau l'emprema radunonza generala el niev local a Cuera. Allas anteriuras radunonzas ha la suprastonza mintgamai envidau ils commembers en ustrias pigl entir Grischun entuorn. Igl agen domicil sesanfla al

Höhenbühlweg 4 davos l'ustria Zollhaus, visavi la Porta sura da Cuera. Dapi igl emprem da fevrer 2017 s'entaupa la suprastonza leu. Il president dalla GiuRu *Wolf Candrian* ha beneventau in pign diember da commembers present ed ha presentau ils projects ed events digl onn vargau. 2016 ha la Giuventetgna Rumantscha festivau 25 onns d'existenza, aschia hai dau plirs eveniments en quei connex. Il giubileum ha la GiuRu festivau el tren denter Mustér e Chapella. Differents musicists han accumpignau l'uniun tras tut las tschun regiuns dalla Romontschia entochen agl Open Air Chapella. Dapi il giubileum ha la GiuRu ina nova pagina d'internet.

Contact internaziunal

In ulteriur impurtont punct dallas activitads igl onn vargau ein ils contacts internaziunals stai. La suprastonza ha presentau plirs projects ed eveniments ch'els han elaborau cun autras minoritads europeas. Dus commembers han presentau la cultura romontscha al project «Bisto International» el center da cultura a Winterthur. Dus commembers han visitau a Kärnten ina minoritad slovena ed il vicepresidente *Maurus Bundi* ha accumpignau duas equipas da ballapei all'Europeada el Tirolo dil sid. La GiuRu ha era envidau autras minoritads en nosa regiun. Aschia han ils Fries, ina gruppa linguistica dalla Hollanda, visitau Maurus Bundi da Daniev. Il vicepresidente ha mussau differents loghens dalla regiun.

Midadas e projects

La suprastonza dalla GiuRu ha nudau ina midada. *Swen Gaberthüel* remplazza la cassiera *Alina Müller*. Avon che daventar cassiera il 2015 ei Müller stada vicepresidente e presidenta dalla GiuRu. Ella resta commembra dalla suprastonza. Enten surprender il niev post tscherca il giuven da Lucerna in contact pli stretg cul lungatg romontsch. Pertuccont las Vuschs Giuvnas fuss la GiuRu leda sch'ella retschevess dapli contribuziuns dalla giuventetgna romontscha. L'uniun vul per quei motiv bonificar vinavon mintga contribuziun cun 50 francs.

«Nus lein aschia augmentar la motivaziun da separticipar a projects e mussar dapli preschientscha», ha il vicepresidente Maurus Bundi detg. Igl onn 2018 organisescha la Giuventetgna Rumantscha in seminari per l'organisaziun YEN. Quella reit d'organisaziuns da giuventetgna europaa ha la finamira da mantener e da sviluppar dretgs per minoritads. Il seminari cul num «Kick off» consista d'in di da sport d'unviern, seras culturalas e musica romontscha. Il liug dil seminari ei aunc buca fixaus.

Mascras

Per la part culturala dalla sera ei la cantadura *Chiara Jacomet* stada responsabla. La giuvna da Rabius ha cantau entginas canzuns digl album «Mascras». Igl emprem album dalla giuvna da 18 onns cumpara igl atun 2017. Chiara e sia band han duvrau la rampa da cargar sco tribuna. Il local dalla GiuRu era pli baul in magasin dil Globus. L'entrada ei stada libra.